



Selasa, 06 Juli 2021

Ogen: Kuan-kuanen 8:6-8



Turiken Kata Tuhu



Kuja pa pe kita, enggo semal sijumpai kata/ gambar masker. Subuk ibas gereja, perkantoren, ingan erbelanja. Gelahna amin gia labo lit kalak ije tedis guna ngatakenca, alu sioge iingetken kita guna make masker. Istilah "maskermu menyelamatkanku, maskerku penyelamatkanmu" mabai kita radu njagai dirinta ras temanta pe gelah reh kitikna me kemungkinen kalak si kena covid ibas masa pandemic enda. Protokol kesehaten enda arus terus isingetken man anak-anakta. Mungkin enterem orangtua make metode mpebiar-biar anakna gelah nggit anakna e make masker. Tapi simehulina, madin ipake metode ngataken kata tuhu (misalna ncidahkan siaran kerna berita-berita perkembangan kalak siterkena covid) asangken mpebiar-biar ia, sebab fatal akibatna secara kejiwana/ psikis. Tapi iajuk min, gelahna ia nyaman make masker aminna pe paksana ia ngerana ras isepe i darat rumah. Prinsipna lanai sembarangen mbuka masker.

Pertenget Salomo mereken persinget tangkas ibas oratenta sendah "dengkehkenlah, kata simeherga sikuajarken enda, payo kerina sikaturiken, la lit si la tuhu dengen papak pe mabaisa." Bage me pe min anak-anakta ibas nginget pengajarenta moria terlebih ibas mpeseh kerna protokol kesehaten enda. Bahwa situhu nge siibelasken kita.

Perlebe kita moria min jadi usihen, adina ras kita idarat rumah ras anakta, idahna min maka kita labo sembarangen kel nalangi maskerta. Janah ola ka min kita ka singatakenca man anakta buka masker ntah lit perayaan ulangtahun temanna, entah erpoto. Alu bage kari tentu ia pe la ngergaken rananta adina sibelasken disiplin ibas makeken protocol kesehaten enda. Sementara 6 wari nari me ia bakal masuk sekolah/ tahun ajaren baru. Tuhu-tuhu kita selaku moria mempersiapkan ia gelah ola aru ateta orang tua bicara ku sekolah pe anakta ibas tahun ajaren baru enda.

 *Kata tuhu mereken kegeluhen, didiklah anakta alu kata e*

